

দ্বাদশ অধ্যায় ২০১৮ সালের রাতের ভোট

১. ভূমিকা

একাদশ জাতীয় সংসদ নির্বাচন ৩০ ডিসেম্বর ২০১৮ তারিখে অনুষ্ঠিত হয়। উক্ত নির্বাচনে বৃহৎ জোটের মধ্যে বাংলাদেশ আওয়ামী লীগের নেতৃত্বে মহাজোট নৌকা প্রতীক নিয়ে এবং ড. কামাল হেসেনের নেতৃত্বে বিএনপিসহ ২০ দলীয় জোটভুক্ত দলগুলোর সমন্বয়ে গঠিত জাতীয় ঐক্যফ্রন্ট নির্বাচনে অংশ নেয়। অপেক্ষাকৃত বেশি সংখ্যক প্রার্থী একাদশ জাতীয় সংসদ নির্বাচনে অংশ নিলেও নির্বাচন প্রতিদ্বন্দ্বিতামূলক ছিল না। একাদশ জাতীয় সংসদ নির্বাচনে সকল দলের জন্য সমান সুযোগ নির্বাচন কমিশন বা সরকারের পক্ষ হতে তৈরি করা হয়নি। ক্ষমতাসীন আওয়ামী লীগকে জেতাতে সরকার ও নির্বাচন কমিশন পক্ষপাতদুষ্ট আচরণ করে। তত্ত্বাবধায়ক সরকারের অধীনে নির্বাচনের দাবিতে আন্দোলনরত রাজনৈতিক দলগুলোকে সুষ্ঠু নির্বাচন অনুষ্ঠানের আশ্বাস দেয় সরকার প্রধান ও নির্বাচন কমিশন। তত্ত্বাবধায়ক সরকারের অধীনে নির্বাচনের দাবিতে আন্দোলনরত বিএনপিসহ রাজনৈতিক দলগুলোকে সংলাপে সরকার ও নির্বাচন কমিশন অবাধ, সুষ্ঠু ও নিরপেক্ষ নির্বাচন অনুষ্ঠানের প্রতিশ্রুতি দেয় যা বিভিন্ন গণমাধ্যমেও প্রকাশিত হয়। সরকার ও নির্বাচন কমিশন কর্তৃক সুষ্ঠু নির্বাচনের আশ্বাসের পরিপ্রেক্ষিতে বিএনপিসহ রাজনৈতিক দলগুলো একাদশ জাতীয় সংসদ নির্বাচনে অংশ নেয়। নির্বাচনে অংশ নেয়ার ঘোষণার পর দলীয় মনোনয়ন ফরম সংগ্রহ করতে গেলেই সরকারের নির্দেশে পুলিশ কর্তৃক গ্রেফতার, হামলা, মামলা ও নিপীড়নের ঘটনা ঘটে যা বিএনপিসহ ২০ দলীয় জোটভুক্ত দলগুলোর সমন্বয়ে গঠিত জাতীয় ঐক্যফ্রন্ট নির্বাচন কমিশনে অভিযোগের মাধ্যমে জানায়। বিএনপিসহ ২০ দলীয় জোটভুক্ত দলগুলোর সমন্বয়ে গঠিত জাতীয় ঐক্যফ্রন্টের প্রার্থী ও নেতা-কর্মীদের নির্বাচনে প্রচারের কোন সুযোগ দেয়া হয়নি। পুলিশসহ সরকারের বিভিন্ন বাহিনী তাদের গ্রেফতার ও হয়রানি করে। সরকার বা নির্বাচন কমিশনে প্রতিকার চেয়েও কোন সহায়তা বা বৈধ গণতান্ত্রিক অধিকার পাওয়া যায়নি। সরকার এবং নির্বাচন কমিশন পক্ষপাতদুষ্ট আচরণ করে ব্যাপক অনিয়মের মাধ্যমে প্রায় সকল আসনেই সরকার ও আওয়ামী লীগ দলীয় প্রার্থীদের বিজয়ী করে। জয়-পরাজয় সরকার এবং নির্বাচন কমিশনের ইচ্ছায় নির্ধারিত হয়, জনমতের কোন প্রতিফলন হয়নি। নির্বাচনে ২৯৯টি আসনের মধ্যে আওয়ামী লীগ নেতৃত্বাধীন মহাজোট পেয়েছে ২৮৮টি আসন। অপরদিকে বিএনপি নেতৃত্বাধীন জাতীয় ঐক্যফ্রন্ট পেয়েছে মাত্র ৮টি আসন।

২০১৮ সালের নির্বাচনে মোট নিবন্ধিত ৩৯টি রাজনৈতিক দলের মোট ১,৭৩৩ জন এবং ১২৮ জন স্বতন্ত্র প্রার্থী মিলিয়ে মোট ১,৮৬১ জন প্রতিদ্বন্দ্বিতা করে। অর্থাৎ গড়ে আসন প্রতি প্রার্থীর সংখ্যা ছিল ৬.২ জন। কোন আসনে বিনা প্রতিদ্বন্দ্বিতায় নির্বাচন অনুষ্ঠিত হয়নি। বিএনপি এবং তার শরিক দলগুলো এ নির্বাচনে অংশগ্রহণ করে। এ নির্বাচন দুটি কারণে বাংলাদেশের নির্বাচনের ইতিহাসে নজির হয়ে থাকবে। প্রথমতঃ নির্বাচনি প্রচারণায় বিরোধী দলসমূহকে অংশ নিতে না দেওয়া এবং দ্বিতীয়তঃ নির্বাচনের পূর্ব রাতে আওয়ামী লীগের জয় নিশ্চিত সিংহভাগ আসনে ভোট সম্পন্ন করে রাখা। ‘রাতের ভোটের নির্বাচন’ বলে পরিচিত এ নির্বাচনকে কিভাবে রাতের ভোটের নির্বাচনে পরিণত করা হয় তা জাতীয় নির্বাচন তদন্ত কমিশনের অনুসন্ধানে বেরিয়ে এসেছে।

২. দলের প্রতি অনুগত সচিব নিয়োগ

২০০৭-১২ সময়কালে কমিশন তাদের পছন্দমতো ব্যক্তিকে সচিব হিসেবে নিয়োগ দেবার জন্য সরকারের কাছে অনুরোধ করত এবং সরকার সে অনুরোধ অনুযায়ী ব্যক্তিকে সচিব নিয়োগ দিত। ২০১৮ সালের নির্বাচনের আগে

৩০.০৭.২০১৭ তারিখে সরকার নিজে থেকেই সচিব মোহাম্মদ আবদুল্লাহকে সরিয়ে সরকারের অত্যন্ত বিশ্বস্ত কর্মকর্তা হেলালউদ্দিন আহমদকে সচিব নিয়োগ দেয়। হেলালউদ্দিন তার শুনানিতে স্বীকার না করলেও নির্বাচন কমিশনে তার কার্যক্রম দেখে বুঝা যায় সরকার তাকে ‘রাতের ভোটের মিশন’ বাস্তবায়নে নির্বাচন কমিশনে নিয়োগ দিয়েছিল। উল্লেখ্য নির্বাচনের পর হেলালউদ্দিন গুরুত্বপূর্ণ স্থানীয় সরকার মন্ত্রণালয়ের সচিব হিসেবে এবং পরে পাবলিক সার্ভিস কমিশনের সদস্য হিসেবে নিয়োগ পান।

৩. গোয়েন্দা সংস্থার ভূমিকা

নির্বাচনি আইনে জাতীয় গোয়েন্দা নিরাপত্তা সংস্থা (এনএসআই) এবং ডিরেকটরেট জেনারেল অব ফোর্সেস ইন্টেলিজেন্স (ডিজিএফআই) এর কোন রকম সংশ্লিষ্টতা থাকার সুযোগ নেই। কিন্তু এ দুটি সংস্থাই মূলত ২০১৪ সাল থেকে নির্বাচনি প্রক্রিয়ার অবিচ্ছেদ্য অংশে পরিণত হয়। ২০১৮ সালের নির্বাচনের পূর্বে নির্বাচন-সংক্রান্ত বিষয়ে এনএসআই নরজদারি, হস্তক্ষেপ এবং সর্বোপরি একটি নির্বাচনের যাবতীয় কার্যক্রমে ড্রাইভিং সিটে থাকতে একটি স্পেশাল সেল স্থাপন করে যা ‘নির্বাচন সেল’ নামে পরিচিত ছিল। রাজনৈতিক দলের নিবন্ধন, দেশীয় ও আন্তর্জাতিক পর্যবেক্ষক নিয়োগ, নির্বাচন কমিশনের কর্মকর্তাদের ভেটিং ও বদলি, মাঠ প্রশাসন কর্মকর্তাদের ভেটিং ও পুনর্বিন্যাস, বিরোধী দলের নেতা-কর্মীদের গ্রেফতার ও হয়রানি এবং নির্বাচনের আগের রাতে ভোটের পরিকল্পনায় এ বিশেষ সেল বিশেষ ভূমিকায় ছিল। ২০১৮ সালের নির্বাচনের আগে এনএসআই সারা দেশের ৩০০ আসনের প্রার্থীদের পরিচিতি, জয়ের সম্ভাবনা, জনপ্রিয়তা এবং তাদের নেগেটিভ দিক যাচাই করেছে।

৪. বিরোধী দলের উপর নিপীড়ন

তফসিল ঘোষণার পরেও বিএনপিসহ বিরোধীদলের নেতা-কর্মীদের উপর নানা রকম নির্যাতন অব্যাহত থাকে। বিএনপি’র পক্ষ থেকে ২,০৪৭টি মামলার তালিকা প্রদান করা হয়। প্রধান নির্বাচন কমিশনারকে অনুরোধ করা হলেও কোন ব্যবস্থা গ্রহণ করা হয়নি। তফসিল ঘোষণার পর থেকে ৮ নভেম্বর থেকে ২৮ ডিসেম্বর পর্যন্ত ১১,৫৮৬ জন বিরোধী নেতা-কর্মীকে গ্রেফতার করা হয়। গোয়েন্দা সংস্থা সারা দেশে বিরোধী নেতা-কর্মীদের তালিকা তৈরি করে এবং সে তালিকা অনুযায়ী পুলিশ তাদেরকে গ্রেফতার/হয়রানি করে।

৫. বিরোধী দলের প্রার্থীদের প্রচারণায় বাধা

গোয়েন্দা সংস্থার পরিকল্পনা অনুযায়ী সারা দেশে বিরোধী প্রার্থীদের নির্বাচনি প্রচারণায় অংশ নিতে দেওয়া হয়নি। ফলে সারা দেশে বিএনপি/এক্যাজোটের প্রার্থীদের পোস্টারসহ নির্বাচনি প্রচারণা সামগ্রী দেখা যায়নি।

৬. খালেদা জিয়াকে নির্বাচন থেকে দূরে রাখা

সরকারের উদ্দেশ্য ছিলো আদালতকে ব্যবহার করে সাবেক প্রধানমন্ত্রী বেগম খালেদা জিয়াকে কারা অন্তরীণ করে বিএনপিকে নেতৃত্ব শূন্য করা। দলের প্রধানকে আটকে রেখে নির্বাচনে অংশগ্রহণের সুযোগ না দেয়া। নির্বাচন কমিশন এ কাজে প্রত্যক্ষভাবে সরকার তথা আওয়ামী লীগকে সহযোগিতা করেছে। সাবেক প্রধানমন্ত্রী বেগম খালেদা জিয়া নির্বাচনে প্রার্থী হিসেবে মনোনয়নপত্র দাখিল করেন। রিটার্নিং অফিসার বেআইনিভাবে উক্ত মনোনয়নপত্র বাতিল করেন। একই ধারাবাহিকতায় সরকারের নির্দেশে নির্বাচন কমিশনও আপিল শুনানিতে সাবেক প্রধানমন্ত্রী বেগম খালেদা জিয়ার মনোনয়নপত্র বাতিল করেন। যদিও প্রয়াত সাবেক নির্বাচন কমিশনার মাহবুব তালুকদার শুনানিতে সাবেক প্রধানমন্ত্রী বেগম খালেদা জিয়ার মনোনয়নপত্র বৈধ বলে ঘোষণা দেন। কিন্তু তৎকালীন প্রধান নির্বাচন কমিশনার ও অপরাপর নির্বাচন কমিশনারগণ সরকারের পরিকল্পনা বাস্তবায়নে সহযোগিতা করার জন্য বেগম খালেদা জিয়ার মনোনয়নপত্র বাতিল করেন। মনোনয়নপত্র বাতিল করা যে অবৈধ ছিল তা নির্বাচন কমিশনের তৎকালীন সচিব মোঃ হেলালুদ্দিন আহমদসহ উর্ধ্বতন কর্মকর্তাগণ তদন্ত কমিশনের নিকট স্বীকার করেছেন।

৭. বিরোধী প্রার্থীদের পোলিং এজেন্টদের অনুপস্থিতি

নির্বাচনের দিন ভোটকেন্দ্রগুলোতে বিএনপিসহ বিরোধী দলের প্রার্থীদের কোন এজেন্ট ছিল না। অনুসন্ধান জানা যায় আইন-শৃঙ্খলা রক্ষাকারী বাহিনী এবং আওয়ামী দলীয় নেতা-কর্মীরা বিএনপি প্রার্থীদের পোলিং এজেন্টদের তালিকা বের করে/সম্ভাব্য তালিকা তৈরি করে তাদের বাড়িতে গিয়ে ভোট কেন্দ্রে না যাওয়ার হুমকি দেয়। (২) আইন-শৃঙ্খলা রক্ষাকারী বাহিনী অনেক এজেন্টকে ধরে দিয়ে যায় এবং সারা দিন আটকে রাখার পর রাতের বেলায় ছেড়ে দেওয়া হয়। এদের অনেককে নির্যাতনও করা হয়। (৩) বিরোধী প্রার্থীদের যেসব এজেন্ট ভোটের দিন সকালে কেন্দ্রে যায়, তাদেরকে কেন্দ্রে প্রবেশ করতে দেওয়া হয়নি। ফলে বিএনপিসহ বিরোধী দলের কোন এজেন্ট কেন্দ্রে দেখা যায়নি।

৮. বেশিরভাগ কেন্দ্রে আগের রাতে ভোট

জাতীয় নির্বাচন তদন্ত কমিশন ৩০ জন প্রিজাইডিং অফিসার এসং সহকারী প্রিজাইডিং অফিসারের সাথে কথা বলেছে। এদের মধ্যে ২৭ জনই (৯০%) স্বীকার করেন যে তাদের কেন্দ্রে আগের রাতে ব্যালটে সিল মারা হয়েছিল। প্রিজাইডিং কর্মকর্তাদের ভাষ্য অনুযায়ী রাত ১০টা থেকে ভোর ৩টা পর্যন্ত সিল মারার কাজটি সম্পন্ন করা হয়। ভোটের দিনের আগের রাতেই অধিকাংশ ভোটকেন্দ্রে সরকারি দল আওয়ামী লীগ ও পুলিশ কর্তৃক নৌকা প্রতীকে সিল মেরে ব্যালট বাস্তব ভর্তির খবর পাওয়া যায়। এবিষয়ে বিবিসি বাংলাসহ অনেক গণমাধ্যমে তথ্য-প্রমাণ প্রকাশিত হয়। প্রতিবেদনে বিবিসি বাংলার সাংবাদিকের ক্যামেরায় ভোটের দিন সকাল ৭টা ৫৪ মিনিটে চট্টগ্রাম-১০ আসনের শহীদ নগর সিটি কর্পোরেশন বালিকা উচ্চ বিদ্যালয়ের একটি কেন্দ্রের ব্যালট ভর্তি ব্যালট বাস্তব এর ছবি প্রকাশিত হয়। বিবিসি'র সাংবাদিক কেন্দ্রটির প্রিজাইডিং অফিসারের কক্ষে গিয়েও ব্যালট ভর্তি বাস্তব দেখতে পান। তিনি তার মোবাইল ফোনের ক্যামেরায় ব্যালট ভর্তি বাস্তব কেন্দ্রের বুথে নেয়ার দৃশ্য ধারণ করেছিলেন বলে প্রতিবেদনে উল্লেখ করা হয়। প্রতিবেদনে আরও উল্লেখ করা হয় যে, ঢাকার অনেক কেন্দ্রে বিবিসি'র সাংবাদিকরা দেখেছিলেন, পুলিশ সদস্যরা কেন্দ্রের মূল দরজা বন্ধ করে কাউকে ভিতরে প্রবেশ করতে দিচ্ছেন না। আরেক কেন্দ্রের ভিতরে সরকার সমর্থক প্রার্থীর পক্ষে ব্যালট পেপারে সিল মারা হচ্ছে। সুশাসনের জন্য নাগরিক-সুজনসহ অনেকে সংস্থা থেকেও এবিষয়ে প্রতিবেদন প্রকাশিত হয়। নির্বাচনের আগের রাতে ভোটকেন্দ্রসমূহে আওয়ামী লীগ ও পুলিশ কর্তৃক নৌকা প্রতীকে ব্যালটে সিল দিয়ে ব্যালট বাস্তব ভর্তি করার অভিযোগ ও খবর পাওয়ার পরও নির্বাচন অনুষ্ঠানের দায়িত্বপ্রাপ্ত সাংবিধানিক প্রতিষ্ঠান নির্বাচন কমিশন কার্যকর কোন পদক্ষেপ নেয়নি। এতো তথ্য প্রমাণ থাকার পরও উক্ত নির্বাচনকে সুষ্ঠু বলে দাবি করে। ভোটের দিন কোন কেন্দ্রে বিএনপিসহ বিরোধী দলের নেতা-কর্মীদের ভোটকেন্দ্রে ঢুকতে দেয়া হয়নি। অন্যভাবে পুলিশ ও আওয়ামী লীগ কর্তৃক তাদের উপর নির্যাতন করা হয়েছে এবং ভোটকেন্দ্র থেকে বের করে দেয়া হয়েছে। এসব অভিযোগে নির্বাচন কমিশন নিশ্চুপ থেকে সরকারি দল আওয়ামী লীগকে সহযোগিতা করেছে। রাতের বেলায় ভোটকেন্দ্রে সংরক্ষিত ব্যালটে নৌকা মার্কার প্রতীকে সিল মেরে ব্যালট বাস্তব ভরে রাখার বিষয়টি তৎকালীন প্রধান নির্বাচন কমিশনার কে এম নুরুল হুদা, সচিব মো: হেলালুদ্দীন আহমদসহ নির্বাচনে দায়িত্বপ্রাপ্ত সকল কর্মকর্তা তদন্ত কমিশনের নিকট স্বীকার করেছেন। নির্বাচন কমিশনকে অন্ধকারে রেখে সরকার, গোয়েন্দা সংস্থা ডিজিএফআই ও এনএসআই, প্রশাসন, পুলিশ প্রশাসন, নির্বাচনে নিয়োজিত প্রিজাইডিং অফিসার, সহকারী প্রিজাইডিং অফিসার ও পোলিং অফিসার সম্মিলিতভাবে রাতের ভোট সম্পন্ন করেছে বলে তৎকালীন প্রধান নির্বাচন কমিশনার তদন্ত কমিশনের নিকট অনুতাপ প্রকাশ করেছেন। এতদসংক্রান্ত কয়েকটি ভিডিও তদন্ত কমিশনের হাতে কাছে এসেছে।

৯. বিএনপিসহ বিরোধী দল বা মতের প্রার্থী ও নেতাকর্মীদের পুলিশ কর্তৃক ভোট প্রদানে বাধা প্রদান, মামলা, হামলা ও হয়রানি

নির্বাচনের শুরু থেকেই পুলিশ নানাভাবে বিএনপিসহ বিরোধী মতের নেতাকর্মীদের বাসায় তল্লাশি, মিথ্যা মামলা দায়ের, অহেতুক গ্রেফতার ও হয়রানিমূলক কার্যক্রম গ্রহণ করে। এতে নির্বাচন কমিশনের কাছে প্রতিকার চেয়েও কোন লাভ হয়নি। নির্বাচন কমিশন কোথাও কোথাও নীরব থেকে সরকারকে সহযোগিতা করেছে, আবার কোথাও কোথাও সরাসরি কারচুপির নির্বাচন আয়োজনে সহযোগিতা করেছে। ধানের শীষ প্রতীকের প্রার্থীসহ কোন প্রার্থীর অভিযোগই কমিশন আমলে নেয়নি। নথি পর্যালোচনায় দেখা যায় বিএনপিসহ বিরোধী মতের প্রার্থী ও কর্মী সমর্থকদের উপর পুলিশের মামলা, হামলা, গ্রেফতার ও বাধা প্রদানের শত শত অভিযোগ পাওয়া সত্ত্বেও নির্বাচন কমিশন কোন ব্যবস্থা নেয়নি। যা তাদের শপথ ভংগের সামিল। কোন ক্ষেত্রেই নির্বাচন কমিশন তাদের সাংবিধানিক ক্ষমতা প্রয়োগ করেনি। তারা শুধুমাত্র পক্ষপাতদুষ্ট দলীয় রিটার্নিং অফিসারদের কাছে পত্র প্রেরণ করেই দায় সেরেছে। এধনের অনিয়ম বা কর্মকাণ্ডের কারণে নির্বাচনে লেভেল প্লেয়িং ফিল্ড তৈরি হয়নি এবং নির্বাচনটি সুষ্ঠু হয়নি।

১০. নির্বাচন কমিশনের পক্ষ থেকে পুলিশের মহাপরিদর্শক (আইজিপি) বরাবর চিঠি

সরকার ও নির্বাচন কমিশন কর্তৃক অবাধ, সুষ্ঠু ও নিরপেক্ষ নির্বাচনের আশ্বাস পেয়ে শুরুতে নির্বাচন বয়কট করা অধিকাংশ রাজনৈতিক দল নির্বাচনে অংশগ্রহণের সিদ্ধান্ত নেয়। তফসিল ঘোষণার শুরুর দিকে নয়ালপল্টনস্থ বিএনপির কেন্দ্রীয় কার্যালয়ে মনোনয়ন ফরম বিতরণ ও দলীয় কার্যক্রমের জন্য কর্মীরা কেন্দ্রীয় অফিসে যখন নিয়মিত আসছে, ঠিক সে সময়ে ১৩ নভেম্বর ২০১৮ তারিখের বিএনপির রাজনৈতিক কর্মকাণ্ডে বাধা দেয়ার উদ্দেশ্যে রাজনৈতিক দলের কার্যালয়ে দলের সভাপতি প্রার্থী ও কর্মী-সমর্থকদের আচরণবিধি অনুসরণ করাতে কঠোর হওয়ার জন্য নির্বাচন কমিশনের পক্ষ থেকে পুলিশের মহাপরিদর্শক (আইজিপি) বরাবর চিঠি দেয়া হয়। উক্ত চিঠির পরিপ্রেক্ষিতে পুলিশ ব্যাপক উৎসাহ নিয়ে সরকারে নির্দেশে বিএনপির কেন্দ্রীয় অফিস ভাংচুর ও অসংখ্য নেতা-কর্মীকে গ্রেফতার ও মামলা দায়ের করে। উক্ত কর্মকাণ্ডে বিএনপিসহ বিরোধী দলের কর্মীরা আতঙ্কিত হয়ে পড়ে।

১১. নির্বাচন অনুষ্ঠানের পূর্বে মাঠ প্রশাসনে দলীয়করণ

নির্বাচনে সরকারি দল আওয়ামী লীগকে অন্যায় সুবিধা দেয়ার জন্য সরকারের আজ্ঞাবহ কর্মকর্তাদের মাঠ প্রশাসনের উচ্চ পদে দায়িত্ব দেয়া হয়। এছাড়া, সচিব পদেও সরকারের আজ্ঞাবহ কর্মকর্তাদের দায়িত্ব দেয়া হয়। পুলিশ প্রশাসনেও আওয়ামী লীগের দলীয় মতাদর্শের লোকদের শীর্ষ পদে বসানো হয়। এবিষয়ে সরকার বা নির্বাচন কমিশন সৎ, দক্ষ ও নিরপেক্ষ লোকদের বদলির মাধ্যমে পদায়নের কোন ব্যবস্থা করেনি, যা বিরল। এবিষয়ে প্রধান রাজনৈতিক দল বিএনপির নেতৃত্বে গঠিত জাতীয় ঐক্যফ্রন্ট এর প্রধান ড. কামাল হোসেন নির্বাচন কমিশনের কাছে নির্বাচনের পূর্বে মাঠ প্রশাসন ও গুরুত্বপূর্ণ মন্ত্রণালয়ের সচিবদের বদলি করে নিরপেক্ষ কর্মকর্তাদের পদায়নের অনুরোধ করেন।

১২. অর্থের ছড়াছড়ি

তদন্ত কমিশনে দেওয়া বিভিন্ন ব্যক্তির সাক্ষ্য ও শুনানি অনুযায়ী ২০১৮ সালের নির্বাচনে ব্যাপক অর্থ ব্যবহার করা হয়। এ অর্থ বেশ কয়েকটি চ্যানেলে ভোট কেন্দ্র পর্যন্ত বিতরণ করা হয়। চ্যানেলগুলোর একটি ছিল প্রশাসনের বিভিন্ন স্তরে অর্থ বিতরণ এবং অন্যটি ছিল পুলিশের বিভিন্ন স্তরে অর্থ বিতরণ। আওয়ামী লীগের পক্ষে কাজ করার জন্য সর্বোচ্চ পর্যায় থেকে এ অর্থ প্রদান করা হয়।

১৩. ভোটারদেরকে কেন্দ্রে প্রবেশ না করতে দেওয়া

১৩.১. একটি আন্তর্জাতিক সংস্থার একদল পর্যবেক্ষক সকাল ৮টা ২০ মিনিটের দিকে ঢাকা-১৪ আসনের বিএডিসি উচ্চ বিদ্যালয় কেন্দ্র পর্যবেক্ষণে যায়। দূর থেকে নিরাপত্তা বাহিনী ও সরকার দলীয় কর্মীরা খেয়াল করে পর্যবেক্ষক দলে বিদেশি পর্যবেক্ষক আছে। তখন নিরাপত্তা বাহিনী ও সরকার দলীয় কর্মীরা উপস্থিত দলীয়

নেতা-কর্মীদের সমন্বয়ে একটি কৃত্রিম লাইন তৈরি করে। লাইনে কয়েকজন প্রকৃত ভোটারও ছিল। পর্যবেক্ষক দল বুঝতে পারে ভোটারদেরকে কেন্দ্রে প্রবেশ করতে না দিয়ে লাইনে দাঁড় করিয়ে রাখা হয়েছে। পর্যবেক্ষক দলের সাথে কয়েকজন ভোটারকে কেন্দ্রে প্রবেশ করতে দেওয়া হয়। প্রবেশকৃত এসব ভোটার ছাড়া কেন্দ্রে অন্য কোন ভোটার ছিল না। পর্যবেক্ষক দল বেলা ২টার দিকে আবার ঐ কেন্দ্রে যায় এবং দেখতে পায় প্রতিটি ভোট কক্ষের বাস্তু ভরা। কেন্দ্রের বাইরে থাকা ভোটারদের সাথে কথা বলে জানতে পারে কেন্দ্রে ভোটারদেরকে প্রবেশ করতে দেওয়া হয় নাই। যারা এসেছে তাদেরকে ফিরিয়ে দেওয়া হয়েছে।

১৩.২. বেলা সাড়ে এগারোটায় মহাখালি তিতুমির কলেজ কেন্দ্র পর্যবেক্ষণে যায় একটি আন্তর্জাতিক সংস্থার একদল পর্যবেক্ষক। তারা দেখতে পায় ভোট কেন্দ্রের বাইরে ভোটারদের লম্বা লাইন। পর্যবেক্ষকগণ লাইনে দাঁড়ানো ভোটারদের সাথে কথা বলে। ভোটাররা অভিযোগ করে তারা ২-৩ ঘণ্টা যাবত লাইনে দাঁড়িয়ে আছে, কিন্তু কোন ভোটারকে কেন্দ্রে প্রবেশ করতে দেওয়া হচ্ছে না। পর্যবেক্ষকগণ কেন্দ্রের ভেতরে প্রবেশ করে সেখানে ক্ষমতাসীন দলের প্রার্থীর পরিচিতি-সম্বলিত ব্যাচ ধারণ করা অসংখ্য ব্যক্তিকে দেখতে পান। ভেতরে কোন ভোটার ছিল না। জাতীয় নির্বাচন তদন্ত কমিশন তদন্তকালে প্রিজাইডিং অফিসার, সহকারী প্রিজাইডিং অফিসার, পোলিং এজেন্ট, সাংবাদিক, প্রার্থীসহ যাদের সাথে কথা বলেছে তারা প্রত্যেকেই একই রকম চিত্রের কথা বলেছে।

বক্স ১২.১: ২০১৮ সালের নির্বাচনের পূর্ব রাতে ভোট জালিয়াতির উদাহরণ - ১

হরিচণ্ডি সরকারি প্রাথমিক বিদ্যালয় (ঢাকা-১ আসন)
নির্বাচনের দিন রাতে প্রথমে আইন শৃঙ্খলা বাহিনী, পুলিশ কর্মকর্তা, র‍্যাব সবাই এসে কেন্দ্র পরিদর্শন করে প্রিজাইডিং অফিসারের সাথে কথা বলে। এরপর মধ্যরাতে আরো দুই-তিন বার এসে ডাকাডাকি করেন। কিন্তু আমাদের প্রিজাইডিং অফিসার দরজা খোলেনি। এরপর সকাল ৮টায় স্বাভাবিকভাবে ভোট গ্রহণ শুরু হয়। কিন্তু সকাল পৌনে নয়টার দিকে কিছু লোক জোরপূর্বক কেন্দ্রে ঢুকে এজেন্টদের বের করে দেয়। ভোটার আসলে বলে, ভোট আমাদের সামনে দিতে হবে। এক পর্যায়ে বলে আমাদেরকে ব্যালট বই দিতে হবে। এমতাবস্থায় আমাদের প্রিজাইডিং অফিসার ভোটগ্রহণ সাময়িক ভাবে বন্ধ করে দেয়। যারা ভোট গ্রহণে বাধা দেয়, তাদের সবার গায়ে নৌকা প্রতীক ও নৌকা প্রতীকের প্রার্থী সালমান এফ রহমানের ছবি সম্বলিত কার্ড ঝোলানো ছিল। তারা আবারও হাঙ্গামা করে। এবং সারাদিন ভোটে অনিয়ম করে। আমাদের প্রিজাইডিং অফিসারকে উর্ধ্বতন কর্মকর্তা, আইন শৃঙ্খলা বাহিনী কোন সহযোগিতা করে নি। আমরা বারবার সাহায্য চেয়ে কোন সহায়তা পাই নি। এভাবে সারাদিন নিয়ম বহির্ভূতভাবে প্রকাশ্যে ভোট নিই। এক সময় আওয়ামী লীগের একজন নেতা উপজেলা আওয়ামী লীগের সাধারণ সম্পাদক জনাব আলী আহসান খান শিকদার তার কর্মীদের জিজ্ঞেস করে, ভোট কত পার্সেন্ট কাস্ট হয়েছে? কর্মীরা বলে, ভাই ৯০%। তখন বলে, আর নিতে হবে না। এরপর ভোট শেষে ফলাফলে দেখা যায় প্রকৃত পক্ষে যতজন ভোট দিতে এসেছেন কাস্টিং ভোট তার চেয়ে বেশি ছিল যা ছিল জাল ভোট।

বক্স ১২.২: ২০১৮ সালের নির্বাচনের পূর্ব রাতে ভোট জালিয়াতির উদাহরণ - ২

কুসুমহাটি চরকুশা পরিবার কল্যাণ কেন্দ্র (ঢাকা-১ আসন)
ভোটের দিন রাতে তিনি যখন কেন্দ্রে যান তখন পুলিশের আচরণ যথাযথ ছিল না। তারা সেইভাবে সাপোর্ট করছে বলে মনে হয়নি। তার স্ত্রী অন্য একটি কেন্দ্রের সহকারী প্রিজাইডিং অফিসার ছিলেন। তিনি তাকে রাত ১২টার দিকে ফোনে জানান, তাদের কেন্দ্রে পুলিশ পাহারায় ৬০% ভোট রাতেই কেটে নিয়ে গেছে। তার স্ত্রী তাকে বলেন, পরিস্থিতি ভালো না, তিনি যেন এইসব নিয়ে বাড়াবাড়ি না করি। এরপর রাত ১২.১৫ মিনিটের দিকে স্থানীয় আওয়ামীগ নেতা তার কেন্দ্রে এসে জানায় ৬০% ভোট আগেই পিটিয়ে রাখতে হবে। তিনি তার প্রস্তাব না মানলে ঐ নেতা বলেন, “আগে এই কেন্দ্রে আওয়ামীগ জিততে পারে নাই। তাই ভোট দিতেই হবে।” ৩০ মিনিট পর ৫/৬ জন ছেলেপেলে আসে। তারাও ৬০% ভোট পিটিয়ে রাখতে বলে। তারা আরো বলে সব জায়গায়ই এমন হচ্ছে। তাদের তিনি অনেক কষ্টে ভোট দিতে দেন নি। এরপর সকালে ভোট শুরু হলে সকালে কিছুক্ষণ পর স্থানীয় আওয়ামী লীগের লোকজন

এসে সব এজেন্ট বের করে দেয়। এরপর তারা জাল ভোট দেয়। এরপর বিকালে আবার লোকজন আসে। তারা বলে এই কেন্দ্রে সবচেয়ে কম ভোট পড়েছে তাই তারা জাল দেওয়ার চেষ্টা করে। ৩০০/৪০০ জাল ভোট দেয়। তিনি ভয়ে ব্যালট লুকিয়ে রেখেছিলেন। এছাড়া একই লোক বার বার ভোট দেওয়ার চেষ্টা করেছে। পরে পুলিশের সহায়তায় তিনি কেন্দ্র নিয়ন্ত্রণে আনেন।

২০১৮ সালের রাতের ভোটের একটি প্রমাণ

জাতীয় নির্বাচন তদন্ত কমিশনের কাছে ২০১৮ সালের নির্বাচনপূর্ব একটি গোপন বৈঠকের রেকর্ডকৃত কথোপকথন এসেছে। ২০১৮ সালের ৭ ডিসেম্বর রাত ১টায় বগুড়া সার্কিট হাউসে গোপন সভাটি অনুষ্ঠিত হয়। বৈঠকের আলোচনার সাধারণ বিষয় ছিল বগুড়া জেলার সংসদীয় আসনগুলোতে আওয়ামী লীগের প্রার্থীদের কীভাবে জিতিয়ে আনা যায় এবং বিশেষ করে বগুড়া-১ আসনে (সারিয়াকান্দি ও সোনাতলা উপজেলা) আওয়ামী লীগ মনোনীত প্রার্থী আবদুল মান্নানকে কীভাবে বিজয়ী করা যায়।

বৈঠকে অনেকের মধ্যে উপস্থিত ছিলেন:

-  জেনারেল সাইফুল আলম, জিওসি এবং এরিয়া কমান্ডার, বগুড়া
-  এসপি আলী আশরাফ ভূঁইয়া
-  বগুড়ার জেলা প্রশাসক ফয়েজ আহমেদ
-  র‍্যাব ও বিজিবি প্রতিনিধি

গোপন বৈঠকে এসপি আলী আশরাফ ভূঁইয়া এবং র‍্যাব ও বিজিবি প্রতিনিধি আওয়ামী লীগের প্রার্থী আবদুল মান্নানের নির্বাচনি সুবিধা-অসুবিধা ব্যাখ্যা করছিলেন। জেনারেল সাইফুল আলম বলছিলেন, “... এটা অস্তিত্বের কোশ্চেন। কথা বুঝতে পেরেছেন? এবার আওয়ামী লীগ ক্ষমতায় না আসলে এটা অস্তিত্বের কোশ্চেন হবে।...তুমি আগের সন্ধিয়ায় ভোট দিবা না শেষ রাতে করবা, ভোটের হিসাব রাইখো। অন্যান্য জেলায় ওরা আপনাদের চাইতে অ্যাডভান্সড। তারা যে ভোটগুলো রাতে দিয়ে দিবে সেগুলো আলাদা করে রাখবে যাতে সকালে এগুলো না বুঝতে পারে। ... আওয়ামী লীগের যারা ভোটের তাদের বলতে হবে সকাল বেলা এসে ভোট দিয়ে যেতে। যারা বিএনপির ভোটের তাদের ভোটের লাইন স্লো করে দিতে হবে যাতে ওরা ভোট দেয়ার সময় না পায়। ... বিএনপির যাদের নামে মামলা আছে তারা বাড়িতে আছে কি না তাদের খোঁজ নিতে হবে, ব্যবস্থা নিতে হবে”। ঠিক এসময়ে জেলা প্রশাসক ফয়েজ আহমেদ বলে ওঠেন, “এইটা বেশি কাজে দিবে”।

১৪. অমৌজিক ফলাফল

বিশ্লেষণে দেখা যায় যে, ৭৫টি আসনের ৫৮৭টি কেন্দ্রের সকল (১০০%) বৈধ ভোট শুধুমাত্র একজন করে প্রার্থী পেয়েছেন। অন্য কোনো প্রার্থী ১ ভোটও পাননি। এই ৫৮৭টি কেন্দ্রের মধ্যে ৫৮৬টিতে (৯৯.৮৩) সকল ভোট পেয়েছেন নৌকা প্রতীকের এবং ১টি কেন্দ্রের (০.১৭%) সকল ভোট পেয়েছেন ধানের শীষ প্রতীকের প্রার্থী। এই ৭৫টি আসনের ৭৪টিতে বাংলাদেশ আওয়ামী লীগের এবং ১টিতে বাংলাদেশের ওয়ার্কার্স পার্টির প্রার্থী জয়ী হয়েছেন। যে আসনের (মাগুরা-২) আওতাভুক্ত একটি ভোটকেন্দ্রে সকল ভোট ধানের শীষ প্রতীকের প্রার্থী পেয়েছেন, সেখানেও জয়ী হয়েছে বাংলাদেশ আওয়ামী লীগের প্রার্থী। এই প্রবণতা সবচেয়ে বেশি লক্ষ্য করা গেছে গোপালগঞ্জ ও মাদারীপুর জেলার সকল আসনসহ সিরাজগঞ্জ-৩, ফরিদপুর-১, নড়াইল-২, ব্রাহ্মণবাড়িয়া-৬ ও বরিশাল-১ আসনে। উল্লেখ্য, গোপালগঞ্জ জেলার ৩টি আসনের ৩৮৭টি কেন্দ্রের মধ্যে ২৩৯টিতেই

(৬১.৭৫%) প্রদত্ত সকল ভোট নৌকায় পড়েছে। গোপালগঞ্জ-৩ আসনের ১০৭টি ভোটকেন্দ্রের ৭৭টিতেই (৭১.৯৬%) শতভাগ ভোট পড়েছে নৌকা প্রতীকে। মাদারীপুর জেলার ৩টি আসনের ৩৭৬টি কেন্দ্রের মধ্যে ৬৮টিতে (১৮.০৮%) প্রদত্ত সকল ভোট নৌকায় পড়েছে। একাদশ জাতীয় সংসদ নির্বাচনে অধিক হারে ভোট পড়াকে অনেকেই প্রশংসিত করেছেন। অনেকের মতে নির্বাচনের দিনের চিত্রের সাথে ৫৮.৮২% ভোটকেন্দ্রে (২৩,৬২১টি) ৮০% এর অধিক ভোট পড়া স্বাভাবিক কোনো ঘটনা নয়^১।

তারপরেও দেখা যায় ৯০% এর অধিক ভোটপড়া কেন্দ্রের শতকরা হার ১৯.৬৭% (৭,৯০২টি) এবং শতভাগ ভোটপড়া কেন্দ্রের শতকরা হার ০.৫৩% (২১৩টি)^২। নির্বাচনে ১১টি কেন্দ্রে ৬ শতাংশের কম ভোট পড়েছে^৩। এই ১১টি কেন্দ্রের ভোট ছিল ১ দশমিক ৩৩ শতাংশ থেকে ৫ দশমিক ২১ শতাংশের মধ্যে। ৪১ হাজার ১৫৫টি কেন্দ্রের মধ্যে ২১৩টি কেন্দ্রে শতভাগ ভোট পড়েছে। আর ৯০ থেকে ৯৯ শতাংশ ভোট পড়েছে সাত হাজার ৬৮৯টি কেন্দ্রে। যার মধ্যে কেবল ৯৯ শতাংশ বা তার বেশি ভোট পড়েছে ১২২ কেন্দ্রে^৪। এছাড়া ৮০ থেকে ৮৯.৯৯ শতাংশ ভোট পড়েছে ১৫ হাজার ৭২৪টি কেন্দ্রে। নিচে ফলাফলের আরো কিছু অসংগতি নিম্নে উপস্থাপন করা হলো;

-  ২২টি ভোটকেন্দ্রে ১ শতাংশের কম ভোট পড়েছে নৌকা প্রতীকে
-  ৬ হাজার ৭৫টি ভোটকেন্দ্রে ১ শতাংশের কম ভোট পড়েছে ধানের শীষ প্রতীকে
-  ২৩টি ভোটকেন্দ্রে ১ শতাংশ ভোট পড়েছে নৌকা প্রতীকে
-  ৩ হাজার ৫০১টি ভোটকেন্দ্রে ১ শতাংশ ভোট পড়েছে ধানের শীষ প্রতীকে
-  ২৯টি ভোটকেন্দ্রে ২ শতাংশ ভোট পড়েছে নৌকা প্রতীকে
-  ২ হাজার ৫৩৫টি ভোটকেন্দ্রে ২ শতাংশ ভোট পড়েছে ধানের শীষ প্রতীকে

পূর্ণাঙ্গ ফলাফল বিশ্লেষণে আরো একটি চমকপ্রদ তথ্য উঠে এসেছে সেটা হচ্ছে শতভাগ ভোট পড়ার রেকর্ড ভোট জালিয়াতির ডামাডোলের মাঝে মাত্র ১.৩৩% ভোট পড়েছে এমন ভোটকেন্দ্রও রয়েছে। স্বল্প ভোট পড়া এসব কেন্দ্রের তথ্য বিশ্লেষণ করতে গিয়ে একটি বিশেষ তথ্য উঠে এসেছে যা নির্বাচনের সার্বিক পরিবেশ নিয়ে একটি বিশেষ বার্তা দেয়। এবারের নির্বাচনে মোট ১১টি ভোটকেন্দ্রে ৫ শতাংশের কম ভোট পড়েছে। এসব ভোটকেন্দ্রের বেশিরভাগের অবস্থানই ক্যান্টনমেন্ট এলাকায় বা এর সন্নিকটে অবস্থিত। এর মধ্যে পাঁচটি ভোটকেন্দ্রের পরিসংখ্যান নিচে তুলে ধরা হলো:

সংসদীয় আসন	ভোটকেন্দ্রের নাম	ভোটের শতকরা হার
যশোর-৩	যশোর ক্যান্টনমেন্ট বোর্ড নিম্নমাধ্যমিক বিদ্যালয়ে	১.৩৩%
রংপুর-৩	সেনানিবাসের কাছে অবস্থিত দ্য মিলেনিয়াম স্টারস স্কুল অ্যান্ড কলেজ	১.৮৭%
বগুড়া-৭	জাহাঙ্গীরাবাদ ক্যান্টনমেন্ট বোর্ড হাইস্কুল	২.০৩%
বগুড়া-৭	বগুড়া ক্যান্টনমেন্ট বোর্ড হাইস্কুল (পুরুষ কেন্দ্র)	২.৩৯%
বগুড়া-৭	বগুড়া ক্যান্টনবোর্ড হাইস্কুল (মহিলা কেন্দ্র)	২.৩৩%

পূর্ণাঙ্গ ফলাফলের পরিসংখ্যান থেকে দেখা যায় মোট ৭৯০২টি ভোটকেন্দ্রে শতকরা ভোট পড়ার হার শতকরা ৯০ থেকে ১০০ ভাগ। সেই একই নির্বাচনে কোনো ভোটকেন্দ্রে শতকরা ১.৩৩% (২ হাজার ১৮৬ জন ভোটারের মধ্যে মাত্র ২৯ জন ভোট দিয়েছেন) ভোটপড়া নিঃসন্দেহে অবিশ্বাস্য। সার্বিক নির্বাচনের ভোটের এরকম

^১ বিস্তারিত পরিসংখ্যানের জন্য ষোড়শ অধ্যায় দেখুন।

^২ পরিশিষ্ট ৬ দেখুন।

^৩ পরিশিষ্ট ১৮ দেখুন।

^৪ পরিশিষ্ট ১৯ দেখুন।

অবিশ্বাস্য ও অসংগতির চিত্র ইভিএমের ভোটের ফলাফলের ক্ষেত্রেও সমান প্রযোজ্য। ব্যালট পেপারের মাধ্যমে ভোট গ্রহণ হয়েছে এসব আসনের গড় ভোট ৮০ দশমিক ৮০ শতাংশ। পক্ষান্তরে, ইভিএমের আসনগুলোতে গড়ে ভোট পড়েছে ৫১ দশমিক ৪২ শতাংশ। ব্যবধান ২৮ দশমিক ৭৮ শতাংশ।

তদন্তে প্রাপ্ত ফলাফল

-  ৮০% কেন্দ্রে ভোটের আগের রাতেই ব্যালট বাক্সে ব্যালট ভরে রাখা হয়েছিল।
-  ২১৩টি কেন্দ্রে শতভাগ ভোট পড়েছে।
-  ৯৯ শতাংশ বা তার বেশি ভোট পড়েছে ১২২টি কেন্দ্রে।
-  ৯০ থেকে ৯৯ শতাংশ ভোট পড়েছে ৭,৬৮৯টি কেন্দ্রে।
-  ভোটের দিন ভোটারদের ভোটকেন্দ্রে প্রবেশ করতে ব্যাপক ভাবে বাধা প্রদান করা হয়েছে।
-  রাতের বেলা ব্যালট বাক্স ভরে রাখার অভূতপূর্ব পরামর্শটি দিয়েছিলেন পুলিশের তৎকালীন আইজিপি জাবেদ পাটোয়ারি।
-  তৎকালীন প্রধানমন্ত্রী এই পরামর্শটি গ্রহণ করেন এবং মাঠ পর্যায়ে পুলিশ, প্রশাসন ও আওয়ামী লীগ এবং এর অঙ্গসংগঠনগুলোর নেতাকর্মীরা তা বাস্তবায়ন করে।

